


ԼԵՎՈՆ ՀՈՎՀԱՆՆԻՍՅԱՆ

(Ծննդյան 80-ամյակի առթիվ)

Հոգու մեծ արիությունն պահանջող, ստեղծագործական աշխատանքի ազնիվ ու վեհ ճանապարհ է անցել Հայաստանի բժշկական գիտության և առողջապահության գործի վետերան Լևոն Հովհաննիսյանը:

Պատմել նրա կյանքի մասին՝ նշանակում է թերթել մեր ռեսպուբլիկայում բժշկական գործի զարգացման մոտ 45 տարիների պատմությունը: Բայց դա էլ դեռ քիչ է: Հարկավոր է ավելի հեռվից սկսել. Լևոն Հովհաննիսյանը ամենաակտիվ մասնակցությունն է ունեցել նաև նախասովետական շրջանի հայ բժշկական կյանքին՝ սկսած 1909 թվականից: Այդ թվականին, ավարտելով Խարկովի համալսարանի բժշկական ֆակուլտետը, նա աշխատանքի է անցնում նախ՝ Թիֆլիսում, այնուհետև՝ Ալավերդում և Անդրկովկասի այլ վայրերում: Արդեն այդ տարիներին է. Հովհաննիսյանը ճանաչման ու հարգանքի է արժանանում՝ բնակչության մեջ տարածված համաճարակային հիվանդությունների դեմ ակտիվորեն պայքարելու համար: Երիտասարդ բժիշկը մեծ ուշադրություն էր նվիրում նաև սնոտիապաշտության և խավարի մեջ խարխափող ժողովրդի շրջանում սանիտարական գիտելիքների տարածման գործին: Այդ տարիներին նա հատկապես ակտիվ գործունեություն ծավալեց Կովկասյան բժշկական ընկերությունում, որտեղ հանդես էր գալիս երկրամասային ախտաբանության տարբեր հարցերի, ինչպես նաև հայ բժշկության պատմության վերաբերյալ արժեքավոր զեկուցումներով:



Դժվար էր հայ բժշկի, հատկապես գիտությանը ծառայելու ազնիվ ձրգտումներով տոգորված մասնագետի վիճակը: Այդ գործի համար չկային ամենատարրական հնարավորություններ:

Շատ տաղանդավոր մարդիկ խորտակեցին իրենց վեհ ձգտումները և ազնիվ ցանկությունները՝ չգտնելով միջոցներ գիտական հետազոտություններ կատարելու համար: Հիշենք խիզախ մտքի և պայծառ հոգու տեր հայ բժիշկ Մարգար Առուստամյանին, որը աշխարհում առաջին անգամ, բելգիացի գիտնական Վան Էրմենհեմից շատ առաջ հայտնաբերեց ձկան թուլյնի (բոտուլիզմի) հարուցիչը, սակայն հնարավորություններ չունենալով փորձառական մի-

ջոցներով հաստատել իր հիպոթեզը, զոհ դարձավ հարստանալու մոլուցքով տարված ձկնարդյունաբերողներին:

Դժվար է պատկերացնել, թե ինչպես կընթանար երիտասարդ բժիշկ Լևոն Հովհաննիսյանի կյանքի ճանապարհը, եթե Հայաստանում չստեղծվեին սովետական կարգեր: Շատ-շատերի հետ, Լևոն Հովհաննիսյանի հանրագուտ աշխատանքի համար նույնպես, աննախընթաց հնարավորություններ ստեղծվեցին Հայաստանը սովետականանալուց հետո:

Ծանր տարիներ էին հայ ժողովրդի կյանքում: Հրից ու սրից դեռ նոր մազապուրծ եղած ժողովուրդը խարխալում էր սովի ու աղքատության, վշտի ու կարիքի մեջ: Դաժան համաճարակներն էլ իրենց հերթին էին հնձում մահվան վիճին հասած ժողովրդին, անաբգել տարածված լինելով երկրում: Հարկավոր էին անձնագոհ մարդիկ, որպեսզի ոտքի հանեն հարազատ ժողովրդին՝ պայքարելու խավարի ու համաճարակների դեմ, ետ մղեն մահը: Դրանց թվում էր բժիշկ Լևոն Հովհաննիսյանը, որը շտապեց Հայաստան՝ հարազատ ժողովրդին անձնվիրաբար ծառայելու համար: Ապարդյուն էին նրա «ինտելիգենտ» մի քանի կոլեգաների հորդորները՝ մնալ «եվրոպական քաղաքների գիտական շրջաններում»: Լևոն Հովհաննիսյանին գայթակղում էր վերածնված ժողովրդի ստեղծագործական եռուզեռին մասնակից դառնալու դժվարին, սակայն ուժանտիկայով աուեցուն կյանքը: Եվ նա եկավ Երևան, որտեղ գտավ նոյեմբերով գոտեպնդված մի նոր երկիր: Սկսվեցին երիտասարդ էնտուզիաստ բժշկի ստեղծագործական կյանքի բուռն տարիները:

Սոսկ բուժական, նեղ միջոցառումներով ոչինչ չէիր անի՝ ցարական մռայլ տարիներից ժառանգություն մնացած համաճարակների, սնոտի պաշտություն և խավարի դեմ կռվելու համար:

Լևոն Հովհաննիսյանն այնտեղ էր, ուր ավելի շատ էին նրա կարիքը զգում: Նա առանձնապես մեծ ջանքեր էր գործադրում՝ բնակչությանը դարբերով մեծ շարիք պատճառող մալարիայի դեմ պայքարի գործում: Եթե հիշենք, որ նախասովետական Հայաստանում երեք բնակչից երկուսը հիվանդ էր մալարիայով, դժվար չէ պատկերացնել, թե բժշկության այս բնագավառը ինչպիսի համառ և տևական աշխատանք էր պահանջում: 1921 թվականին, Հայաստանի բժիշկների առաջին համագումարում, կազմվեց մալարիայի դեմ պայքարող հատուկ հանձնաժողով՝ Լ. Հովհաննիսյանի նախագահությամբ: 3 տարի անց Երևանում բացվեց մալարիաբանության գիտահետազոտական ինստիտուտ՝ բժշկական ինստիտուտների առաջնեկը Հայաստանում: Այդ ինստիտուտի ստեղծման գործում խոշոր ավանդ ունեցավ Հովհաննիսյանը, որը երկար տարիներ որպես կոնսուլտանտ էր աշխատում այնտեղ: Մեկը-մյուսի ետևից հրատարակվեցին ինստիտուտի գիտական աշխատությունների ժողովածուները, որոնք վկայում էին մալարիաբանության և պարազիտաբանության բուռն զարգացումը նախկինում գիտական հիմնարկներից միանգամայն զուրկ Հայաստանում:

Դժվար է մեկառմեկ թվարկել այն բոլոր բժշկական կազմակերպությունները, գիտական հիմնարկները և բնկերությունները, առողջապահական մասնաճյուղային միջոցառումները, որոնց ակտիվորեն մասնակցել, ղեկավարել է Լևոն Հովհաննիսյանը՝ իր գիտա-բժշկական գործունեության 55 տարիներին: ... 1923 թվական: Իրականացավ հայ բժիշկների վաղուց փայփայած, նվիրական իղձը. Երևանի պետական նորաստեղծ համալսարանում բացվեց

բժշկական ֆակուլտետ: Հանգուցյալ պրոֆեսորներ Վահան Արծրունու, Գրիգոր Արեշյանի, Քեչեկի և մյուսների հետ, Լեւոն Հովհաննիսյանը ակտիւ մասնակցութիւն է ունենում այդ ֆակուլտետի ստեղծմանը: Նա ստանձնում է ներքին հիվանդութիւնների պրոպագանդիկայի ամբիոնի վարիչի պաշտոն: Շուրջ 42 տարի Հովհաննիսյանն այդ ամբիոնի անփոփոխ ղեկավարն է: Այդ երկար տարիների ընթացքում ամբիոնը դարձել է ներքին հիվանդութիւնների գծով գիտութեան հզոր կենտրոն, որտեղ մշակվել են բժշկագիտական շատ բարդ և մեծարժեք պրոբլեմներ: Այս ամբիոնում է կոփվել ներքին հիվանդութիւնների մասնագետների մի ամբողջ համաստեղութիւն, որոնցից շատերն այժմ Հայաստանում և նրա սահմաններից դուրս ճանաչված թերապևտ-պրոֆեսորներ են: Դրանցից են գիտութեան վաստակավոր գործիչներ պրոֆեսոր Արսեն Սիմոնյանը և Վարդան Ավագյանը, բժշկական գիտութիւնների դոկտոր Զավեն Դուրբաջյանը, հմուտ սրտաբան դոցենտ Աննա Ֆարմանյանը, բժշկական գիտութիւնների թեկնածու Ֆրիքս Դրամբյանը և շատ ուրիշներ:

Ինչպես առնականաւորով, մայր թոշունից ուժ առնելով, հեռուներն են ճախրում թոշունները, այնպես էլ Լ. Հովհաննիսյանի կողմից ղեկավարած ամբիոնից 40-ից ավելի տաբիների ընթացքում գիտութեան հեռուներն են թռել նրա դաստիարակած աշակերտները, երբեք սակայն չմոռանալով իրենց հարգարժան, մեծ հոգու և գիտական հզոր էրուդիցիայի տեր ուսուցչին:

Մեծ են Լեւոն Հովհաննիսյանի ծառայութիւնները մեր ռեսպուբլիկայում բժշկական գիտութեան, հատկապես ներքին հիվանդութիւնների վերաբերյալ գիտական մտքի զարգացման բնագավառում: Դժվար է հիշել ներքին հիվանդութիւնների և նրա հետ անմիջականորեն առնչվող որեւէ մասնաճյուղ, որտեղ իր ավանդը մուծած չլինի Լեւոն Հովհաննիսյանը: Այդ մեծ ծառայութիւնների համար պատահական չէ, որ նա ընտրվել է թերապևտների համամիութենական ընկերութեան պատվավոր անդամ: Լեւոն Հովհաննիսյանի գրած դասագրքերը երկար տարիներ բժիշկների և բժշկական ինստիտուտի ուսանողների սեղանի գրքերն են դարձել:

Այժմ էլ եռում է գիտական կյանքը Նրեանի բժշկական ինստիտուտի ներքին հիվանդութիւնների պրոպագանդիկայի ամբիոնում և նույնանուն կլինիկայում: Հմուտ մասնագետի ղեկավարութեամբ գիտական ուսումնասիրութիւններ են կատարում երիտասարդ մի խումբ բժիշկներ:

Սովետական իշխանութեան տարիներին Հայաստանում բուժական գործի մի նոր բնագավառի՝ առողջարանային շինարարութեան սկիզբը դրվեց: Դարերով աննպատակ հոսում էին Զերմուկի և Արզնիի հանքային ջրերը, իսկ հիվանդը «Կարլսբադի աղ» էր երազում՝ բուժվելու համար: Մարդիկ ի՞նչ իմանային, որ հեռավոր Զեխոսլովակիայի Կարլովո-Վարի հանքային ջրերին համանման հանքային ջրեր Հայաստանի լեռներում են հոսում, սակայն ապարդյուն կորչում անդնդախոր ձորերում:

Այժմ մեր երկրում լայնորեն հայտնի են Զերմուկը և Արզնին՝ Հայաստանի առաջնակարգ սանատորիաները: Այս երկու առողջավայրերի բուժական ազդակների առաջին ուսումնասիրողը, առողջարաններ ստեղծելու գիտական առաջին հիմնավորողը եղել է Լեւոն Հովհաննիսյանը՝ իր կոլեգաների հետ: Արդեն մի քանի տասնյակ տարի Հովհաննիսյանը զբաղվում է Հայաստանի հանքային ջրերի և առողջավայրերի ուսումնասիրութեամբ: Երկար տարիներ լինելով Արզնի առողջարանի մշտական կոնսուլտանտը, նա անփոխարինելի

ծառայություններ ունի այստեղի հանքային ջրերի՝ հատկապես հիպերտոնիկ հիվանդության բուժման ազդակների ուսումնասիրության գործում:

Լևոն Հովհաննիսյանի խմբագրությամբ լույս են տեսել գիտական բազմաթիվ աշխատություններ կուրորտաբանության տարբեր հարցերի վերաբերյալ:

Չկա կուրորտային գործի զարգացման մի որևէ խնդիր, որի լուծման գիտական հարցերում իր բանիմաց խորհուրդներով մասնակից չլինի Լևոն Հովհաննիսյանը: Դժվար է մեկառմեկ խոսել մեծանուն բժշկի ու գիտնականի փառահեղ կյանքի բոլոր դրվագների մասին: Սակայն նշենք դրանցից մի քանիսը: 1937 թվականին Լևոն Հովհաննիսյանը պաշտպանում է դոկտորական դիսերտացիա, 1940 թվականին նրան շնորհվում է գիտության վաստակավոր գործչի կոչում, պատերազմի տարիներին նա մի շարք զինվորական հոսպիտալների կոնսուլտանտ էր, որի համար պարգևատրվում է Աշխատանքային կարմիր դրոշի շքանշանով: 1943 թվականին նա ընտրվում է Հայաստանի գիտությունների ակադեմիայի իսկական անդամ, մեկ տարի անց՝ Սովետական Միության բժշկական գիտությունների ակադեմիայի ակադեմիկոս: 1944 թվականին Լևոն Հովհաննիսյանի նախաձեռնությամբ Հայաստանի գիտությունների ակադեմիայում ստեղծվում է հայ բժշկության և բիրոլոգիայի պատմության սեկտոր, որը հսկայական գործ կատարեց ժամանակի փոշիներից մաքրելու և ի տես աշխարհի առաջավոր մարդկության ցուցադրելու հայ ժողովրդի բժշկական մտքի շողշողուն գանձերը: Մեկը մյուսի ետևից լույս են տեսնում Լևոն Հովհաննիսյանի «Բժշկության պատմությունը Հայաստանում» սովորածավալ 5 հատորները:

Դոցենտներ Խուրշուդ Մելիք-Փարսադանյանի, Արծրուն Կծոյանի, Ալեքսանդր Լալայանի և մյուսների աշխատակցությամբ հրատարակվում են նաև բժշկա-պատմագրական այլ աշխատություններ: 1951 թվականին հրատարակվում է Լևոն Հովհաննիսյանի և մյուս հեղինակների «Լատին-ռուս-հայերեն բժշկական բառարանը», որը կապիտալ աշխատություն էր և իր ծավալով ու մեկնաբանությունների հարստությամբ հավասարը շուններ մեզ մոտ մինչ այդ հրատարակված բժշկական բառարանների մեջ:

1954 թվականին Լ. Հովհաննիսյանը ընտրվում է Հայաստանի թերապևտների ընկերության նախագահ: 1949—1951 թվականներին Լևոն Հովհաննիսյանը 3 անգամ մասնակցել է Խաղաղության կողմնակիցների համամիութենական կոնֆերանսներին և ելույթ ունեցել այնտեղ:

Լևոն Հովհաննիսյանի անունը հայտնի է և առանձնապես սիրելի աշխարհի տարբեր երկրներում բժշկության պատմության հարցերով զբաղվող գիտնականների շրջանում: Նա հաճախ է գրքեր և նամակներ ստանում Կուբայից, Իսպանիայից, Ֆրանսիայից, Չեխոսլովակիայից, որտեղ մարդիկ խորհրդակցում են նրա հետ, իրենց աշխատությունների մասին կարծիքներ խնդրում՝ բժշկության պատմության հմուտ մասնագետից: Առանձնապես մեծ ժողովրդողականություն է վայելում Լևոն Հովհաննիսյանի «Հայ բժշկության պատմության նկարագրողումներ» ունիկալ ալբոմը, ինչպես նաև նրա «Հայ բժշկության պատմություն» աշխատությունը, որը վերջերս լույս է տեսել Ֆրանսիայում: 1963 թվականին Լևոն Հովհաննիսյանին ընտրեցին բժշկության պատմության միջազգային ակադեմիայի իսկական անդամ:

Նա մասնակցել է Իսպանիայում ու Ֆրանսիայում հրավիրված բժշկության պատմության համաշխարհային կոնգրեսներին և հանդես եկել այնտեղ մեծարժեք զեկուցումներով:

Երբ մի քանի տարի առաջ Երևանում ստեղծվեց սրտաբանության և սրտի վիրաբուժության գիտահետազոտական ինստիտուտ, շնայած իր պատկառելի տարիքին, Լեւոն Հովհաննիսյանը տաճնեց այդ ինստիտուտի դիրեկտորի պաշտոնը: Այժմ ինստիտուտը դարձել է սրտաբանության և սրտային վիրաբուժության հզոր կենտրոն, որտեղ նրա սկսած գործը շարունակում են նրա տաղանդավոր հետևորդները:

Ամբողջ սրտով ողջունելով հարգարժան բժիշկ և անխոնջ գիտնական Լեւոն Անդրեւիչ Հովհաննիսյանի ծննդյան 80-ամյակը, ցանկանանք նրան նորանոր հաջողություններ սովետական բժշկագիտության զարգացման գործում:

Ռ. ՓԱՐՍԱԴԱՆՅԱՆ